

მინი ტურნირებზე

ჩვენი ფეხბურთელები – მე-2 ადგილზე

ესპანეთიდან მოსკოვს დაბრუნდნენ თბილისის "დინამოს" ფეხბურთელები, რომლებიც მონაწილეობდნენ კუნძულ ლას-პალმასზე გამართულ საერთაშორისო ტურნირში.

ესპანეთის ქალაქებში წესადაა ზაფხულობით საერთაშორისო მინი-ტურნირების გამართვა 3-4 გუნდის მონაწილეობით. შარშან თბილისელები მონაწილეობდნენ ქ. უელვაში, სადაც პირველი პრიზის მფლობელები გახდნენ წლეულს კი ისინი ლას-პალმასზე მიიწვიეს. ეს ტურნირი მიძღვნილი იყო აქტიური კლუბის – "ლას-პალმასის" არსებობის 25 წლისთავისადმი. მასში მონაწილეობდნენ მასპინძლები, თბილისის "დინამო" და პოლონეთის ერთ-ერთი უძლიერესი გუნდი "გურნიკი"(ზაბჟე).

დინამოელებს პირველი მატჩი 27 აგვისტოს ჰქონდათ "გურნიკთან" შესვენებისთვის ჩვენი გუნდი წინ იყო – 1:0 (ბურთი გაიტანა გ. ნოდიაშვილი). მეორე ტაიმში წერეთელმა და მ. მაჩაიძემ კიდევ ორჯერ აიღეს მეტოქის კარი, პოლონელებმა კი შეძლეს საპასუხო ბურთის გატანა. გაიმარჯვა "დინამომ" – 3:1.

მეორე დღეს თბილისელები შეხვდნენ "ლას-პალმასს" და დაძაბულ ბრძოლაში დამარცხდნენ 1:2 (ბურთი ჩვენი გუნდიდან გაიტანა მ. მაჩაიძემ).

ტურნირის დასკვნით მატჩში ლას-პალმასმა დაამარცხა "გურნიკი" – 4:3 და მოიპოვა მთავარი პრიზი. თბილისელები მე-2 ადგილზე გავიდნენ.

”ლელო”, 1.09.1974 წ.